

Evening Dogri News

10 June 2024

18:15 Hrs

Headlines

- रियासी च होए दे आतंकवादी हमले च घायल श्रद्धालुं कन्नै उपराज्यपाल होरें मलाटी कीती। उनें मारे गेदे श्रद्धालुं दे नेइमें रिश्तेदारें लेई 10-10 लक्ख रुपें ते घायल श्रद्धालुं लेई 50-50 जहार रुपें देने दी घोषणा कीती।
- रियासी जिले च श्रद्धालुं दी बस पर होए दे आतंकवादी हमले च शामिल आतंकवादिएं गी फगड़ने लेई व्यापक तपाशी अभियान जारी, एनआईए, एसआईए नै हमले आहली थाह दा दौरा लाया।
- प्रधानमंत्री नरेंद्र मोदी होरें पी.एम किसान सम्मान निधि योजना दी 17मीं किश्त जारी कीती, आखेआ जे सरकार करसानें ते राई-बाई आले सैक्टर दी बेहतरी लेई कम्म करदी रौहग।
- प्रधानमंत्री नरेंद्र मोदी होरें आखेआ जे सरकार अपने त्रिए कार्यकाल दौरान खिते दी शांति, प्रगति ते खुशहाली लेई कम्म करदी रौहग।

<><><><><><>

LG-Terror Attack

उपराज्यपाल मनोज सिन्हा होरें रियासी च होए दे आतंकी हमले गी जम्मू क्षेत्र च अशांति फलाने दी नापाक कोश्ट करार दिता ऐ।

<><><><><><>

Reasi-NIA

राश्ट्री जांच एजेंसी दी इक टीम अज्ज रियासी जिले च पुज्जी गेई ऐ जेहड़ी मकामी पुलिस कन्नै रलिये कल तारें संझा लै इक्क यात्री बस पर होए दे आतंकी हमले दी जांच करोग। हमले च 9 लोक मारे गे हे ते केई जखमी होए हे। आकाशवाणी दे जम्मू संवाददाता नै खबर दिती ऐ जे सुरक्षा बलें हमले दे जिम्मेदार आतंकिये दा पता लाने ताई बड्डे पैमाने पर घेराबंदी करिये तपाशी अभियान रम्भ करी दिता ऐ। आतंकवादिये कल तारें रियासी जिले दे पौने इलाके च पौंदे ग्रां तेरयाथ कश शिवखोड़ी मंदर थमां कटड़ा वैष्णो देवी जा करदी 53 सीटर बस पर गोलीबारी कीती ही जिस करिये बस शिड़कै थमां रूलकिये ढूंगी खाई च जाई पेई ही। बस च उत्तर प्रदेश, राजस्थान ते दिल्ली दे यात्रु सवार हे। इस आतंकी हमले च राजस्थान दे दऊं बरें दी बरेसू ते उत्तर प्रदेश दे 14 बरें दे जागतें सने 9 लोकें दी मौत होई गेई ही। हमले च 3 थमां 50 बरें दी बरेसू दे 33 लोक जखमीं बी होए न जिंदे इचा 10एं गी गोली लग्गी ऐ। जंगली इलाके च तपाशी ताई ड्रोन दा

इस्तेमाल बी कीता जा करदा ऐ। मौके पर सेना ते राज्य आपदा प्रतिक्रिया बल एस.डी.आर.एफ बी मौजूद हे। मौके पर मौजूद लोकें मताबक इस घटना गी द'ऊं आतंकियें अंजाम दिता ऐ।

<><><><><><>

Reasi Search Operation

सुरक्षा बलें रियासी च तपाशी अभियान चलाया ऐ। एह तपाशी अभियान शिवखोड़ी थवां आवा रदे श्रद्धालुएं दी बस पर होए दे हमले जेदे च 9 श्रद्धालु मारे गए ते 33 घायल होई गए हे, दी पछौकड़ च चलाया जा रदा ऐ। प्रदेश आपदा प्रतिक्रिया बल रियासी पुज्जी चुके दा ऐ। तपाशी अभियान च ड्रोन दी मदद बी लैती जा रदी ऐ। बस शिवखोड़ी थवां कटड़ा जा रदी ही जिसले आतंकवादिएं संझा 6 बज्जिये 10 मिंटे पर औदे पर हमला करी दिता। एह हमला रियासी जिले दे पौनी इलाके च होआ। एह इलाका राजौरी जिले कन्नै लगदा ए। आतंकवादिएं गोलियां चलाइयां जेदे चलदे डरैवर दा गड्डी पर नियंत्रण नेई रेया ते बस खाई च जाई पेई ते हादसे दा शिकार होई गेई।

<><><><><><>

Pez. VP-Terror Attack

राश्ट्रपति द्रोपदी मुर्मू ते उपराश्ट्रपति जगदीप धनखड़ होरें जम्मू-कश्मीर दे रियासी जिले च यात्रुएं दी बस पर होए दे आतंकी हमले पर बसोस प्रगट कीता ऐ। राश्ट्रपति द्रोपदी मुर्मू होरें आखेआ जे एह मनुक्खता बक्खी कीते गेदा इक्क बड्डा अपराध ऐ जेदी सख्त अक्खरें च निंदेया होनी लोड़चदी। उनें गलाया जे समूलचा देस दुखी ते पीड़ित परोआरें कन्नै खड़ोते दा ऐ। उपराश्ट्रपति जगदीप धनखड़ होरें आखेआ जे उनेंगी इस हमले थमां गहरा दुख पुज्जा ऐ। उनें गलाया जे ओह इस घिनौने आतंकी हमले दी सख्त लफ्जें च निंदेआ करदे न। उपराश्ट्रपति होरें दुखें दी इस घड़ी च सौगी परोआरें कन्नै हमदर्दी जतांदे होई बसोस प्रगट कीता।

<><><><><><>

Congress-Protest

जम्मू-कश्मीर च आतंकवादी हमले टकोहदा करियें उनें इलाकें च जेड़े पैहले शांति हे, च बाद्दे खलाफ कांग्रेस पार्टी नै इक्क विरोध प्रदर्शन कीता। जम्मू-कश्मीर कांग्रेस कमेटी **J.K.P.C.C.** दे कार्जकारी प्रधान रमन भल्ला होरें होर दुए सीनियर लीडर कन्नै अज्ज प्रदेश कांग्रेस कमेटी जम्मू दे मुख्यालय बाहर शहीदी चौक जम्मू च विरोध प्रदर्शन दी अगुवाई कीती। श्री भल्ला होरें रियासी जिले च शिवखोड़ी थमां कटड़ा जाने आहली बस पर होए दे आतंकी हमले दी सतख निंदेआ कीती। हमले च 9 लोकें दी मौत ते तकरीबन **33** होर दुए जख्मीं होए हे। इंदे चा मते सारे लोक उत्तर प्रदेश ते दिल्ली दे रौहने आहले न।

<><><><><><>

Protest-Kathua

साबका फौजियें दी भलाई बेहतरी आहले संगठन एक्स सर्विसमैन वेलफेयर एसोसिएशन कठुआ नै अपने प्रधान कैप्टन ज्ञान सिंह पठानिया हुंदी नुमायंदगी च रियासी च वैष्णो देवी दे बेकसूर तीर्थ यात्रियें गी नशाना बनाने आहले पाकिस्तान ते पाक प्रायोजित आतंकवाद खलाफ विरोध प्रदर्शन कीता। संगठन नै दिवंगत आत्माएं गी शांति देने ताई दऊं मिटें दा मौन बी रक्खेआ। उनें आतंकवाद खलाफ सख्त कार्रवाई ते पाकिस्तान गी सबक सखाने दी मंग कीती।

<><><><><><>

Modi PM Kissan

प्रधानमंत्री नरेंद्र मोदी होरें अज्ज त्रीs बारी प्रधानमंत्री दा औहदा सांभदे गै पीएम किसान सम्मान निधि दी 17मीं किस्त जारी करने दी पैहली फाइल पर दस्तखत कीते। इस किस्त कन्नै 9 करोड़ 30 लकख करसानें गी तकरीबन 20 ज्हार करोड़ रुपें दा लाह पुज्जोग। श्री मोदी होरें गलाया जे नमीं सरकार च उंदा पैहला फैसला करसानें दी भलाई बेहतरी बक्खी सरकारें दी बचनबद्धता गी दस्सदा ऐ। प्रधानमंत्री होरें गलाया जे उंदा सरकार औने आहले समें च करसानें ते राईबाई क्षेत्र ताई और बी मते कम्म करदी रौहग। ध्यानजोग ऐ जे पीएम किसान योजना 2019 च समूलचे देसै दे जिमी आहले करसान परोआरें गी माली मदाद देने दे मकसद कन्नै रम्भ कीती गई ही। इस स्कीम तैहत हकदार करसान परोआरें गी हर बरें 6 ज्हार रुपें दी माली मदाद दिती जंदी ऐ। एह रकम 2-2 ज्हार रुपें दियां त्रै किस्तें च सिद्धे लाभार्थियें दे बैंक खातें च पाए जा करदे न। इस योजना थमां 11 करोड़ शा बद्द करसान परोआरें गी लाह थ्होआ करदा ऐ ते अजें तगर इनें खातें च त्रै लकख करोड़ रुपें शा बद्द रकम पाई जाई चुकी दी ऐ।

<><><><><><>

PM-Meet

प्रधानमंत्री नरेंद्र मोदी होरें आखेआ ऐ जे भारत उन्दे त्रीये कार्जकाल च खिते दी अमन-रमानदारी, तरक्की ते खुशहाली लेई कम्म करना जारी रक्खोग। श्री मोदी होरें खिते दे लोकें बश्कार तगड़े सरबंध ते संपर्क बदाने दा आहवान कीता। उनें कल रातीं राष्ट्रपति भवन च संगंध चुक्कने आहले समारोह मगरा भारत दे गोआंडी देसें ते हिंद महासागर क्षेत्र दे लीडरें कन्नै मलाटी दौरान एह गल्ल आक्खी। प्रधानमंत्री होरें इनें लीडरें गी धन्नवाद दिंदे होई गोआंडी पैहले आहल नीति ते सागर दृष्टिकोण बक्खी भारत दी बचनबद्धता दोहराई। श्री मोदी होरें आखेआ जे भारत अंतरराष्ट्रीय क्षेत्र च ग्लोबल दक्खन दी अवाज बुलंद करना जारी रक्खोग। नरेंद्र मोदी होरें कल संझा उप्परोतली त्री बारी प्रधानमंत्री दे तौरा पर संगंध लैती। राष्ट्रपति द्रौपदी मुर्म होरें राष्ट्रपति भवन च आयोजित समारोह इच श्री मोदी ते नमीं मंत्रि परिषद दे मिम्बरें गी औहदे ते राजदारी दी संगंध दोआई ही।

शपथ ग्रहण समारोह दौरान 30 कैबिनेट मंत्रियों, 5 राज्य मंत्रियों (स्वतंत्र पभार) ते 36 राज्य मंत्रियों सगंध लैती।

<><><><><><>

Cabinet-Meeting

अज्ज नमें केंद्री मंत्रिमंडल दी पैहली बैठक लग्गने दी मेद ऐ। कल प्रधानमंत्री नरेंद्र मोदी ते उंदे नमें मंत्रि परिषद नै सगंध लैती ही। राष्ट्रपति भवन च राष्ट्रपति द्रोपदी मुर्मू हों श्री मोदी ते नमी मंत्रि परिषद दे मिम्बरें गी इक्क समारोह च पद ते गोपनीयता दी सगंध दोआई ही।

<><><><><><>

Niti-Ayog

नीति आयोग दे साबका उपाध्यक्ष राजीव कुमार हों अज्ज आखेआ जे प्रधानमंत्री नरेंद्र मोदी हुंदी नुमायंदगी आहली एनडीए सरकार गी अपने त्रीये कार्जकाल दौरान देसै च बेरोजगारी दी समस्या कन्नै निब्बड़ना लोड़चदा ऐ। श्री कुमार हों इस गल्ला पर जोर पाया जे सरकार गी हुन 4 लेबर कोडें यानि श्रम संहिताएं गी खीरी रूप देना लोड़चदा कीजे एहदे च पैहले गै मती देर होई चुकी दी ऐ। इक्क समाचार एजेंसी गी दिते गेदे इंटरव्यू च उनें आखेआ जे मोदी सरकार गी सब्बनें शा महत्वै आहला सुधार बेरोजगारी दी समस्या कन्नै निब्बड़ने च आनना चाइदा ऐ। कुमार हुंदे मताबक रोजगार दे नमें मौके पैदा करने बारे च इक्क महत्वै आहली गल्ल एह ऐ जे लोहके ते दरम्याने उद्यमें ताई कम्म करने दे हालात गी होर सखल्ला बनाया जा।

<><><><><><>

Public-Darbar

गृह विभाग दे प्रधान सचिव चंद्राकर भारती हों अज्ज उधमपुर जिले दे दौरै दौरान आम लोकें गी पेश आवा करदियां दिक्कतें-परेशानियें गी सुनने ते विकास गतिविधियें दा जायजा लैने आस्तै जनता दरबार दी प्रधानता कीती। जनता दरबार च जिला विकास परिषद दे चेयरमैन लाल चंद, उधमपुर दियां डी.सी सलोनी राय, एसएसपी जोगिंद्र सिंह हुंदे सने मकामी लोकें शिरकत कीती। एहदे शा पैहले चंद्राकर भारती हों जिले दे बक्ख-बक्ख मैहकमें पास्सेआ लाए गेदे स्टालें दा निरीक्षण कीता। कार्जक्रम दौरान खुल्ली गल्ल-कत्थ कीती गेई जेदे आम लोकें अपनियें मंगें ते शकैतें दे तौले नबेड़े लेई उनेंगी मौके पर मौजूद अफसरें अगगै रक्खेआ।

<><><><><><>

PM-Shri School

स्कूली शिक्षा सरबन्धी मैहकमे दे प्रधान सचिव अलोक कुमार होंरें श्रीनगर च त्रै दिन दी समर्थ निर्माण कार्यशाला दा उद्घाटन कीता। एह् कार्यशाला रिसोर्स पर्सन्स ते सरबन्धी धड़ें लेई आयोजित कीती गई ऐ। एह् कार्यशाला पी.एम श्री स्कीम दा हिस्सा ऐ जेदा सरिस्ता अलामा इकबाल लाइब्रेरी दे कांफ्रेंस हाल च कीता गेआ ऐ। एहदा मकसद शिक्षा दे म्यार गी बदाना ऐ। अपने उद्घाटनी संबोधन च अलोक कुमार होंरें पी.एम श्री स्कूल इक महत्वै आली भूमिका निभाई सकदे न ते बेहतर ते उत्कृष्टता दी मिसाल बनी सकदे न। एह् स्कूल जम्मू-कश्मीर च शिक्षा सरिस्ते लेई इक मेद ऐ। अलोक कुमार होंरें मेद जाहिर कीती जे एह् सिखलाई कार्यक्रम सारे जरूरी ते महत्वपूर्ण पैहलुएं गी हल करने माहिरें थवां जानकारी हासिल करने च मददगार साबित होग।

<><><><><><>